

Ribogojilište Blagaj

U Bosni i Hercegovini je poslije oslobođenja rekonstruisano i adaptirano nekoliko salmonidnih ribogojnih objekata koji su bili izgrađeni još u bivšoj Jugoslaviji, a izgrađen je daleko veći broj novih objekata. Inicijatori izgradnje novih objekata bile su organizacije sportskih ribolovaca, koje su željele da u njima proizvedu što više mladih domaćih vrsta salmonidnih riba za poribljavanje otvorenih ribolovnih voda. Samo tri-četiri ribogojna objekta izgradile su privredne organizacije za proizvodnju dužičaste pastrve u konzumne svrhe.

Za proteklih trideset godina izgrađeno je toliko mrestilišta i ribogojilišta da bi pod uvjetima normalnog korišćenja kapaciteta, bilo moguće proizvoditi količine, koje bi višestruko premašile sadanje potrebe mladih salmonida za poribljavanje u SRBiH. Međutim, postojeći kapaciteti slabo se koriste, mnogi objekti uopšte više ništa ne proizvode, većim dijelom služe kao depoi ugostiteljskih objekata za držanje manjih količina dužičaste pastrve za konzum, tako, da u republici još nemamo dovoljno pojedinih vrsta mladih za sve korisnike ribljeg fonda, koji žele da poribljavaju svoje vode. Posebno smo deficitarni u mladih lipnjena, mladice i glavatice, iako još uvijek imamo solidnu matičnu bazu koja omogućava proizvodnju većih količina mladih ovih vrsta riba.

Naročito iznenađuje činjenica da i nekoliko ribogojnih objekata, koji djeluju kao privredne organizacije, a koji su ranije proizvodili znatnije količine mladih potočne pastrve, zapostavljaju u posljednje vrijeme ovu proizvodnju i proizvode male, gotovo simbolične količine mladih potočne pastrve. Ovo se događa i pored toga što je proizvodnja mladih za poribljavanje rentabilna (traži samo više truda), a prvobitna namjena tih objekata bila je isključivo proizvodnja domaćih salmonidnih vrsta riba za poribljavanje. Ipak, ohrabruje činjenica da ima i izuzetaka i ribogojnih objekata koji ne gube iz vida svoju prvobitnu namjenu i koji se trude da unaprede i povećavaju proizvodnju mladih salmonida za poribljavanje. Jedan takav ribogojni objekat je HIT-OUR Ribogojilište Blagaj u Blagaju, o kome će ovdje biti više govora.

HIT-OUR Ribogojilište Blagaj izgrađeno je svojevremeno na inicijativu Udruženja ribolovaca Mostar radi proizvodnje mladih mekousne i potočne pastrve i mladih glavatice za poribljavanje Neretve i pritoka. Ovaj ribogojni objekat izvršava taj zadatak više godina sa nešto više ili manje uspjeha, s tim da svake godine nije bio u mogućnosti da obezbjedi dovoljne količine mladih mekousne pastrve i glavatice, ali realni planovi za naredni period i mjere i zahvati koji se preduzimaju govore o tome, da će se i pomenute slabosti prebroditi i proizvodnja unaprediti. Garancija za to su proširenje kapaciteta ribogojilišta i riješenja kadrovskih pitanja angažiranjem tehnologa stručnja-


ka, koji se nekoliko godina specijalizirao za proizvodnju mladih salmonida u inostranstvu, kao i dosadanja dugogodišnja iskustva u proizvodnji.

Ove godine Ribogojilište Blagaj, pored postojećeg ribogojnog objekta nedaleko izvora rijeke Bune, pustilo je u mjesecu februaru u Blagaju u pogon nov objekat površine 5.100 m² vodenog ogledala. U njemu će se već ove godine proizvesti stotinu tona dužičaste pastrve za konzum i moći uzgajati veća količina mladih. Rezultati rada u prvih šest mjeseci ove godine pokazuju, da je tehničko rješenje ovog objekta potpuno uspješno, da objekat ima konstantan protok vode od 1.500 l/sek i da je rast ribe prema očekivanju odličan. Plasman ribe osiguran je na mostarskom dijelu sarajevskog područja i područja Makarske rivijere.

Ono što posebno raduje organizaciju sportskih ribolovaca Bosne i Hercegovine jeste ovogodišnji uspjeh Ribogojilišta Blagaj u proizvodnji mladih salmonidnih vrsta riba za poribljavanje i planovi za proizvodnju mladih u narednom periodu. Već ove godine ovaj objekat je proizveo preko jedan milion komada mladih potočne i mekousne pastrve i jezerske zlatovčice i uglavnom podmirio potrebe mladih u SRBiH. Kapacitet objekta omogućava proizvodnju do tri miliona mladih godišnje, a već za 1976. godinu se proizvodnja oko dva miliona mladih potočne i mekousne pastrve, jezerske zlatovčice i glavatice tako da će biti moguće isporučiti i veće količine mladih za potrebe organizacije sportskih ribolovaca u SR Hrvatskoj i SR Srbiji.

Koristeći vrlo povoljne uslove i bogatstvo vode za proizvodnju, Ribogojilište Blagaj planira da već iduće godine proizvodi i dvogodišnju potočnu pastrvu i mladih lipnjana koji se mnogo traže u Bosni i Hercegovini. Ribogojilište već ove godine vrši eksperimentalni uzgoj manjih količina mladih lipnjana od ikre nabavljene u SR Sloveniji. Već narednih godina objekat će koristiti matičnu bazu iz rijeke Bune, gdje je lipljen pred nekoliko godina nasaden i veoma dobro napreduje. Neobično je važno da ribogojilište može da koristi solidan matični fond mekousne pastrve iz Bune i glavatice iz Neretve, dok za proizvodnju mladih potočne pastrve ima u jažama sa normalnim protom vode hiljadu i po komada matice vanrednog kvaliteta izlovljenih u hercegovačkim vodama (Gacko i Jablanica).

Ribogojilište neprekidno proširuje saradnju sa organizacijama zainteresiranim za unapređenje ribarstva i stupa u aranžmane za izradu programa poribljavanja pojedinih pastrvskih revira. To obuhvata pitanja dogovaranja za ulaganje u zdravstvenu zaštitu ribljeg fonda, ispitivanje sadanjenog stanja populacije i unapređenja ribljeg fonda u narednom periodu. Takav aranžman ima Ribogojilište sa HC »Rama« za ramsku



Otvaranje novog dijela »Ribogojilišta Blagaj« — februar 1975. godine

akumulaciju. Organizacija sportskih ribolovaca SRBiH zadovoljna je sa ovakvim zalaganjem i uspjehom Ribogojilišta Blagaj i želi da ono i ubuduće uspješno

radi i ispuni njena očekivanja u proizvodnji domaćih salmonidnih vrsta mladi za poribljavanje.

Milan Vinterhalter, Sarajevo

Prvi kongres slatkovodnog ribarstva Jugoslavije 1950. godine u Zadru

(Povodom 25. godišnjice)

Ministarstvo ribarstva NR Hrvatske organiziralo je i sazvalo u ljetu 1950. god. Prvi kongres slatkovodnog ribarstva Jugoslavije u Zadru. Ovom skupu poslovnih i naučnih ustanova slatkovodnog ribarstva iz cijele Jugoslavije prisustvovalo je oko 100 uzvanika. Pokrovitelj kongresa bio je ministar ribarstva SRH, Vice Buljan. Iako službom zauzet nije prisustvovao kongresu, sa mnogo pažnje pratio je sve pripreme i sa strane ministarstva poduzeo sve, da se učesnici

kongresa gostoljubivo prihvate, dobro organizira rad kongresa u Zadru i pripreme dva izleta. Prvi izlet izvršen je ribarskim brodom »Pagar« na ribolov plave ribe na Kornatsko otočje. Na brodu je za učesnike bila pripremljena večera. Drugi izlet iza toga upriličen je autobusima na Vransko jezero.

Na zborovanju kongresa u Zadru podnijeto je više referata, ali najzapaženiji bio je referat o zaraznoj vodenoj bolesti šarana, praćen sa velikim interesom.